



O martes 11 de xaneiro, celébrase unha nova xuntanza do club de lectura Sete Vidas organizado pola asociación Espazo Lectura. Nesta ocasión, a novela escollida é *Unha historia que non vou contar* do autor Cid Cabido. Será na Biblioteca de Gondomar a partir das 20.00 horas. A partir das 21.00h o propio autor, Cid Cabido, achegarase para compartir as impresións dos lectores e lectoras sobre o libro.

O libro

Con *Unha historia que non vou contar* (Xerais, 2009) o escritor Cid Cabido retorna á actualidade cunha novela que cuestiona os moldes da propia ficción. Dinamitando os cimentos da novela e partindo dun estilo depurado e persoal que sempre caracterizou ao autor, *Unha historia que non vou contar* conforma unha novidosa e intrigante narración protagonizada por un escritor que habita un apartamento en plena Porta do Sol viguesa, fronte ao Sereo de Leiro.

A partir dun suceso real que conmocionou o Vigo dos anos 70, a novela arrastra con voracidade ao lector por unhas páxinas ateigadas de intriga, de humor, de orixinalidade e de constantes referencias cinematográficas que conforman o particular universo literario de Cid Cabido. *Unha historia que non vou contar* enfronta ao lector ás miserias e contradicións da sociedade viguesa dos últimos estertores do franquismo e, ao tempo, convídao a repensar a propia construción literaria do que é unha novela, botando man dos recursos narrativos propios

Escrito por Redaccion @valminorinfo
Luns, 10 Xaneiro 2011 10:05

da non ficción. Sen dúbida ningunha, estamos diante dun gran libro, que suscitará interese e debate dos lectores e da propia crítica literaria.

O autor

Cid Cabido (1959) ten publicadas, entre outras, as seguintes obras narrativas: Días contados (1991), Premio Cidade de Lugo de Narrativa; Panificadora (1994), Premio Blanco Amor de Novela 1994; Oralmente pola boca (1997); grupo abeliano (1999), Premio Blanco Amor de Novela 1999; Fálame sempre (2003); Blúmsdei (2006); e Unha historia que non vou contar (2009), Premio Asociación de Escritores en Lingua Galega 2010. Todas elas publicadas por Edicións Xerais.